

Ny Valosoa sy hadihady

Tsy manana politika momba ny mponina

Tsy mahafehy ny fitantanam-bahoaka ny fitondrana Rajoelina

T ranga iray lehibe niseho teto amin'ny firenena tamin'ity taona ity, ny fisian'ireo fianakaviana maro avy any atsimo, nifindra monina noho ny antony ara-pivelomana. Tsy nety tamin'izy ireo intsony ny nonina teo amin'ny tany nonenany noho ny antony ara-toetrandro sy toe-tany izay tsy ahafahana miaina sy mivelona intsony ho azy ireo. Eo ny antony iray lehibe iarahamahalala dia ny kere. Voatery tsy maintsy nifindra monina araka izany izy ireo, ary nandeha tamin'ny toerana maro samihafa teto amin'ny Nosy izay nosafidiany aleha, rehefa avy nandalo teto an-drenivohitra. Mazava loatra, nisy ihany koa ireo nijanona teto an-drenivohitra.

Misy ny manome tsiny ireo olona ireo, any amin'ny toerana misy azy any. Toa ireo nisafidy ny any akai-kin'ny faritra Ankarafantsika iny, noho ny fahapotehan'ny ala sy ny doro tanety mitranga. Mety misy hadisoan'izy ireo ihany izany, noho ny tsy fitandremana na noho ny fikimpiana fotsiny izao ireo sisa mba ho velona. Toy izany koa ireo any amin'ny toeran-kafa, izay misy milaza ny amin'ny tsy fandriampahalemana lasa mitranga any aminy. Toe-javatra maro samihafa no tsy maintsy mitranga ary mety mandona ny efa lasi-pivelomana sy fiainana tamin'ireny toerana nifindra-monin' izy ireo ireny. Midika izay, fa maro izy ireo no nifindra-monina. Tsy maintsy misy vokany ihany koa izany any amin'ny toerana nialàny.

Tsy tokony hadinoina, fa ny Malagasy dia tia mifikitra amin'ny tany onenany sy ivelomany, indrindra ireo nisy ny razany. Efa tsy fidiny ho azy, ary tsy azony anoharana intsony matoa izy mandao ny tanindrazany. Iza no tomponandraikitra amin'izy ireo? Mazava loatra, fa ny minisiteran'ny mponina sy indrindra ny fitondrana no tomponandraikitra voalohany amin'izany rehetra izany. Maneho miharihary ny tsy fananana politika mazava momba ny mponina izao fitondrana Rajoelina izao, matoa misy izany. Ny IEM-n-dRajoelina tsy nahatsinjo izany olana izany velively, hatrany Frantsa niketrehany ny hirotsaka hofidiana ho filoham-pirenena. Ary na efa tafakatra teo amin'ny fitondrana aza izy sy ekipany, dia mbola tsy nahavita namaritra tao anaty fotoana fohy ny politika mazava momba ny mponina rehetra isa-paritra. Satria, tsy ilay vahoaka Malagasy loatra no tiany asandratra voalo-

hany fa ny tenany sy ny antokony, sy ny ikatsahany ho voalohany mihoatra amin'ireo mpifaninana politika rehetra aminy eto Madagasikara. Izao efa mitranga ny olana, dia ilay vahoaka ve no omena tsiny? Tanindrazany ity Madagasikara ity, iombonan'izy ireo amin'ny Malagasy rehetra. Raha tena mpitondra manana ny fitiavany-tanindrazana marina, sy tia ny vahoaka Malagasy marina ary mitsinjo azy ireo tokoa, dia efa nahatsiaro tena ho tomponandraikitra voalohany amin'ny fisiana Malagasy, mpiray tanindrazana mihinana ny tsy fihinana intsony. Inona no nitranga raha teto an-drenivohitra no nisy ampahana mponina nihinana ambina hoditra kiraro toy ny tany atsimo ireny? Raha mpitondra mahatsiaro tena marina ho tomponandraikitra mivantana momba ny mponina dia efa nametra-pialàna avy hatrany vao mitranga izany. Ny tsikaritra amin'ny fomba fitantanam-pirenena ataon'izao fitondrana Rajoelina izao, dia raha tsy efa misy fisehoan-javatra lehibe mitranga eo amin'ny mponina na ny vahoaka vao mody mikoropaka. Izany hoe, midika izany, fa tsy mahafehy ny fitantanana ny fiainam-bahoaka izao fitondrana izao. Ohatra akaiky, vaovao mbola maresaka izao ny zava-nitranga tany Soanierana Ivongo ireny. Tsy voafehy ny fanarahamaso ny fifamovoizana an-dranomasina eto amintsika, satria mbola misy afaka mitsoriaka mangala-dia ihany, ary hamoizana ain'olona marobe mampalahelo toa ireny. Miharihary fa misy tsy fahampiana ny fitaovam-pifamoivoizana an-dranomasina itateram-bahoaka eto amintsika, na ny fanaraha-maso ihany koa. Ary tsy any amin'iny morontsiraka atsinanana iny ihany izany, fa na any andrefana sy atsimon'ny Nosy ihany koa, na amin'ny morontsiraka manontolo manodidina an'i Madagasikara mihitsy. Ny mahamaika an-dRajoelina sy ireo ekipany, dia vahaolana mbola afaka miandry, "téléphérique", "tramway", sns... Ireny mantsy ilay azo isehosehoana sy idedahana ary ahafahana miaro seza sy tombontsoa manokana, anaovana fampielezan-kevitra ihazonana fitondrana. Ilay mponina, ny sarambabem-bahoaka Malagasy manerana ny Nosy, fa tsy eto an-drenivohitra ihany, anefa etsy ankilany, tsy ao an-tsainy ao anatin'izany, sy tsy voatsinjo amin'ny fitaterana izay mampijaly azy isan'andro vaky izao.

Sôh'son

Olan'ny delestazy

Ireo vahaolana atolotry ny orinasa Jirama

Manoloana ny olan'ny delestazy misy eto Antananarivo Renivohitra sy ny manodidina, nanolotra vahaolana ho amin'izany omaly ny ao amin'ny orinasa Jirama.

Hisy fametrahana vata mpanova rianaratra lehibe 2 vaovao samy hitondra tanjaka 60MVA avy :

-ny iray efa tafatsangana fa mbola ampifandraisina amin'ny tambazotra,

-ny iray mbola hapetraka.

Fitsidihana sy fitsirihana ireo vondrona mpihary rianaratra napetraka eny anivon'ny hopitaly sy ny CTC.

Natao ny andrana hanampanana ny fandehany raha sanatria misy ny fahatapahana, ka 5 segondra dia velona ary 20 segondra farafahaelany dia mandeha ny rianaratra ary mahazaka tsara ireo "concentrateurs d'oxygène" izy ireo.

Toy izao ny tanjak'ireo vondrona mpihary rianaratra sahanin'ny JIRAMA :

1. CHU Andohatopenaka : 200 kVA.

2. CHU Anosiala : 250 kVA.

3. CTC Soamandrakizay : 110 kVA.

4. CTC Village Voara : 110 kVA.

5. Hôpital Ambohimandra : 175 kVA.

6. CHR Bongatsara : 72 kVA.

Ny CHR Anosiavaratra sy ny CHR Ambohimangakely ihany koa dia samy manana vondrona mpihary rianaratra izay tsy sahanin'ny JIRAMA kosa.

Hitohy amin'ny fanamafisana ny famatsiana rianaratra ao amin'ny HJRA, HOMI sy ny CTC Mahamasina (raha misy fisokafana) ihany koa ny asa anio maraina.

Torak'izany ihany koa ny fametrahana vondrona mpihary rianaratra vaovao sy ny fanasarahana ny "circuit" famatsiana oxygène, mbola hatao amin'ny fiandohan'ny herinandro ho an'ny Hopitaly HJRB, izay efa tena antitra ny fitaovana sy ny CTC Ankorondrano (raha misy fisokafana).

Orinasa mpamokatra oxygène EOLE : hametrahana vata mpanova rianaratra manana tanjaka 400 kVA dieny anio, hanafoanana ny mety ho fahatapahana sy hahafahana mampitombo ny vokatra.

Laharam-pahamehana ireo zotra mamatsy ny hopitaly, indrindra fa ireo mandray ny mararin'ny Covid, ka nohamafisina ny toromarika mba tsy ho tapaka ireo zotra ireo raha tsy efa tena goavana ny tsy fahampiana, ka ireo zotra ireo, izay miisa 48, no averina avy hatrany alohan'ny hafa rehetra.

Ny toky fitaka fa ny atao no ho hita, ka ho hita eo raha tsy hisy fahatapahana intsony ny angôvon'aratra vokarin'ny orinasa Jirama, efa nahafaty olona izay delestazy izay ny herinandro teo, ka dia manantena fiovana ny rehetra.

Stefa

RESAKA « TÉLÉPHÉRIQUE »

Mihantona ny famatsiam-bola hanaovana azy

Efa nitsofan'ny fitondrana mozika ny hoe asiana "téléphérique" hono eto Antananarivo Renivohitra, izay nambara fa hampihena ny olana misy eo amin'ny fifamoivoizana hono.

Raha hazavaina tsotsotra ny atao ho "téléphérique" dia fitaterana mihantona sy mikorisa amin'ny tady vita amin'ny tariby matevina misy rianaratra eny ambony eny, "transport par cable" ihany koa no azo iantsoana azy.

Vola trosaina amin'ny tahirimbola frantsay no hananganana azy io, saingy ny mampihomehy araka ny fiteninjatovo dia toa hihantona indray ny famatsiana ity fitaterana mihantona ity, izay azo inoana fa hihafara amin'ny faharavan'ilay tetik'asa mihitsy.

Tamin'ny 23 Novambra 2021 lasa teo dia nivory ny Antanimierandoholona frantsay nandinika mikasika ny tetibola, loholona 290 no nandatsabato, ka

ny 237 dia nitsipaka ny tetibola nisy an'io fananganana "téléphérique" eto amintsika io, tamin'ny 14 Desambra 2021 teo indray dia nandefa taratasy fampieritretetana an' Andriamatoa Bruno Lemaire, Minisitry frantsay miadidy ny Toekarena sy ny Fitananambola ny Loholona frantsay Pierre Laurent, nambarany tao anatin'ny taratasy, fa tsy laharam-pahamehana ho an'ny vahoaka malagasy izay miaina ao anatin'ny fahasahiranana ny 80 isanjatony, ny fananganana ny "téléphérique", ny kere izay manjaka any amin'ny faritra atsimo no tokony hijerena vahaolana maika hoy ity loholona frantsay ity.

"Dia ny tena no menatra" hoy ny fitenenana izay mahazo vahana ankehitriny, isika vahoaka malagasy manontolo no tiana ambara eto, mampisitribelona tokoa satria ireo loholona frantsay indray no mahatsapa ny faho-

riana mianjady amin'ny vahoaka malagasy fa ny antsika ireo olomboafidy malagasy dia lavitry ny afo ny kitay amin'ny fitsinjovana ny fiainambahoaka, ireny niara-nahita ireny ny fankatoavana ny fampindramambola hananganana ny "téléphérique" nataon'ireo solombavambahoaka maro an'isa, toy izany koa ny nafitsok'ireo loholona izay nankasitraka 100 isanjato ilay tetikasa vendrana be. Raha ny fahitana ny fihe-tsiky ny frantsay dia ho faty ankaranany io tetikasa io, dia hiaraka ho afabaraka na ny fahefana mpanantanteraka na ny fahefana mpanao lalàna, ary tsy afa-miala ihany koa ny fahefana mpitsara dia ry zareo eny Ambohidahy nankatoa izay tsy tokony ho toavina.

Ny tena mahatsikaiky amin'ity tetikasa ity dia ilay fakan-kevitra mody natao, kanefa efa lanin'ireo fahefana mpanao lalàna ity lazaina fa hakana

hevitra, maro ireo fanambarana mivoaka manameloka sy misakana ny fananganana io "téléphérique" io, saingy manao be marenina izy mianakavy tompom-pahefana, kinanjo izao ny frantsay mpandoa-bary mihitsy no midradradradra fa tsy laharam-pahamehana ho antsika malagasy ity fitaterana mihantona sy manao gorisagorisa toa an'i Besorongola ity. Na dia tsy dia fanaontsika eto amin'ny gazety aza ny mankasitraka ireo vazaha, dia tsy maninona fa ataontsika izany amin'ity indray mitoraka ity, satria noporofoin'ireo loholona frantsay fa ny azy ireo dia ny loha tokoa no misaina, indrisy f'ireto loholona malagasy izay nanaiky ilay tetikasa 100 isanjato dia tsy fantatra intsony ny mendrika iantsoana azy, fa toa ...n'olona ireto izy mianakavy.

Ny Valosoa

TOMONKALO

Aza mba donto ihany

Hatreto dia mitazam-potsiny iretsy donto mianakavy, Manoloana ilay aretina izay mamely tsy hay sakanana. Efa hita tsotr'izao fa tsy nahomby ilay tambavy, Vakitsiny anefa hatreto tena tsy ampy fanentanana !

Ny mpitarika mihitsy no ilaina ho modely, Ka andrasana hotsindronina eo imaso-mpianakavy. Saingy hatreto ny filoha tsy nanamafy velively Hoe vita vakitsiny ve sa nianina amin'ilay tambavy !

Raha izao no zava-misy dia ho lalina atsy ho atsy Fa tsy maintsy ho avy indray ireo fepetram-pihobohana. Ny amin'izay indrindra anefa, efa maivana ny vatsy Ka ampoizina fa maro no efa tsy hahazo tohana !

Ny arotava dia efa be no efa tsy manao intsony, Saingy tsisy fitenenana ka dia mahagaga ihany. Rahoviana indray vao hidina irony baiko avy any ambony, Ka halefa hamafa lalana ireo izay tsy manao izany ?

Izy ity anie tsy toy ny raharahan-jazakely, Ka dia petatoko hatrany fa tsy misy fanomanana. Sa rehefa tena feno ny hopitaly sy ny hotely, Izay vao hihetsika ianareo hanao ilay V amin'ny tanana ?

Ka amin'izay dia hoe VONJEO no teny tiana hampitaina: Mila vonjy i Gasikara, f'eo an-dalam-pahaverezana. Sendra izay mpitondra dedaka nefa tena tsy misaina, F'efa zatra ny bontolo sy fanaovana letrezana !

DADAN'i RIANA (25-12-21)